

45 BELIA SERTAI SIRI JELAJAH TUN ABDUL RAZAK DI LUAR NEGARA

Date: 18-05-2011
Author: / YAM LES BK

BELIA-JELAJAH

KUALA LUMPUR, 18 Mei (Bernama) -- Seramai 45 belia Malaysia akan menjelajah ke United Kingdom (UK), Belanda, Belgium, Luxembourg dan Perancis bagi menjayakan siri jelajah "Tun Abdul Razak, Bapa Pembangunan - Suatu Pengkisahan" dari 6 hingga 18 Jun.

Presiden Majlis Belia Malaysia (MBM) Mohamed Maliki Mohamed Rapiee berkata program anjuran Orlaith Inc Sdn Bhd dan Yayasan Perikatan Malaysia dengan kerjasama MBM itu bertujuan mengenang kembali perjalanan Allahyarham Tun Abdul Razak Hussein semasa menjadi pemimpin belia dahulu.

Selain dapat mencontohi sifat-sifat kepimpinan Allahyarham yang sangat aktif pada usia mudanya, program jelajah itu juga untuk mengeratkan hubungan dua hala antara MBM dan pertubuhan belia di Eropah, katanya.

"Program ini dapat memupuk penglibatan belia-belia Malaysia dan Eropah dalam penyediaan belia ke arah globalisasi dan pada masa yang sama mempertabatkan sumbangan Allahyarham Tun Abdul Razak kepada negara," katanya dalam sidang media mengenai program jelajah itu di sini hari ini.

Antara pengisian program jelajah itu ialah persidangan di antara perwakilan belia-belia UK dan Eropah, sesi dialog, suai kenal kebudayaan antara negara, taklimat, penerangan dan pameran mengenai program jelajah "Tun Abdul Razak, Bapa Pembangunan - Suatu Pengkisahan", katanya.

Pengarah Urusan Orlaith Inc Sdn Bhd Azam Ismail Bakri berkata program jelajah itu adalah wacana bagi mengumpul maklumat sejarah dan kisah Allahyarham Tun Abdul Razak daripada individu dan tokoh yang telah bersama-sama turut berjuang semasa hayatnya.

Selepas mendapat maklumat lengkap mengenai Allahyarham, termasuk bekas setiausaha sulit kepada Allahyarhama Datuk Zakaria Ahmad, Orlaith Inc Sdn Bhd dan Yayasan Perikatan Malaysia akan menghasilkan buku mengenai diri negarawan tersebut, katanya.

Beliau juga berkata pihaknya bercadang menganjurkan teater "Tun Abdul Razak - Suatu Pengkisahan" di Royal Albert Hall, London, UK, sebelum berlangsungnya Sukan Olimpik 2012.

Sehubungan itu, beliau meminta pihak kerajaan dan swasta menyalurkan sumbangan bagi memastikan penganjuran teater tersebut dapat direalisasikan memandangkan kos penganjuran teater di Royal Albert Hall itu sangat tinggi.

-- BERNAMA